

De maffia

- Cees: Moj, inspecteur.
- Inspecteur: Goiendag, jong. Hest wat nijs veur mie?
- Cees: Nait recht wat nijs, zol ik hoast zeggen, mor wel wat te vroagen.
- Inspecteur: Je binnen verslaggever of je binnen t nait. Woar gaait t vandoage over, Cees.
- Cees: Over de maffia-praktijken hier op t dörp.
- Inspecteur: Wat letst mie ja schrikken jong. Over de maffia hier op t dörp? Dat bestaait toch nait.
- Cees: Dat docht ik in eerste instansie ook en doarom stoa ik hier nou ook bie joe op stoepe.
- Inspecteur: En woar zol dij maffia touholden, volgens die?
- Cees: Volgens Jan de Bont.
- Inspecteur: Ho, ho, Cees Maggelt, nou beweegst die op glad ies. Nou begriep ik ook waarom dast doe in t wilde weg zo mor over maffiosa begunst.
- Cees: Ie kinnen Jan de Bont dus wel.
- Inspecteur: Kinnen? Kinnen? Ik kin hom van hoaver tot görte.
- Cees: Dat verboast mie. Hai beweert noamelk dat joe hom nait kinnen.
- Inspecteur: Den logt e.
- Cees: Loat mie het den zo stellen, hai zegt, dat joe hom laiver niet willen kennen.
- Inspecteur: Wat aal n geplaas van dij Jan de Bont. Hai moakt t wel oardeg bont, vin ik. Dat ik hom laiver nait zol willen kennen. Woar slagt dat nou op.
- Cees: Op de maffia-praktijken van t baauwbedrief van Dirk de Beugel.
- Inspecteur: t Wordt nou wel es tied, dast mie oetlegst, woar aal dij verhoalen votkommen. t Liekt ja net alsof ik in de bekloagdenbaanke zit bie die.
- Cees: Doarom bin ik hier ook bie joe op veziede. Je mouten nait onderschatten, wat aal dizze maffiosa-verhoalen bie pad en weg mit joen reputoatsie doun.
- Inspecteur: Ist zo aarg?
- Cees: Dat willen je nait geleuven.
- Inspecteur: Hou kinnen we dat soort verhoalen oet de wereld helpen.
- Cees: Deur schoon schip te moaken en de woarhaid op toavel te leggen. Den kriegen alle lezers van d'kraante in elk geval n objektief beeld veur ogen.
- Inspecteur: Loaten we dat mor hopen. Woar wolst begunnen.
- Cees: Jan het mie verteld, dat wat t baauwbedrief van Dirk de Beugel doan het nait deur de beugel kin. Dat zai hom onder drok zetten om rekens te betoalen, woar hai hailemoal gain wait van het. Hai het zulms al draigbraiven had, woarin ston, dat as e nait binnen n weke betoalde, ze hom aine op dak sturen zollen.
- Inspecteur: Ong?
- Cees: Ong, inspecteur? Hai het joe dij braiven zain loaten. Hai is der zulms mit op t plietsiebero west en het zien beklag bie joe doan. En nou zeggen ie ohh, net of ie der niks van waiten.
- Inspecteur: Oh, dij braiven van Jan. Joa, dat is ook zo. t Is al weer n zetje leden, dat Jan bie mie op t bero west is, mor nou wait ik t weer.
- Cees: En wat hebben ie mit dij draigementen doan, inspecteur?
- Inspecteur: Ik wait nait of ik die aal dizze informoatsie wel geven kin, Cees. t Is wel gehaime en vertraauwleke informoatsie en dat kin nait zo mor bie pad en weg kommen.
- Cees: Leg nou eerst mor es oet, inspecteur, wat ie mit Jan zien klacht doan hebben. Den kinnen we noatied wel kieken wat ik doarvan publiceren kin.
- Inspecteur: Liekt mie goud. Ik mout natuurlek nait in de problemen kommen deur dien verhoaltje.
- Cees: t Zol nait aan mie liggen.
- Inspecteur: t Zit zo. Ik bin noa Jan zien bezuik mit de betrevvende braiven noar de boas van t baauwbedrief goan.
- Cees: Dus wel.
- Inspecteur: Tuurlek. Ik bin der toch om d'vaileghaid van d'minsen op t dörp te beschaarmen.

Cees: En wat zee de boas.

Inspecteur: Wat ik die nou vertel, mout nait in d'kraante Cees.

Cees: As joe mie nait vertellen, wat Dirk de Beugel zee, den kin ik nait bepalen oft wel of nait publikoabel is.

Inspecteur: Dij boas, Cees, hè, dij was zo aldernoast vergrèld.

Cees: Op Jan?

Inspecteur: Ook, mor veural op mie. Waist wat e zee: Dat ik mie veur t karrechie van Jan de Bont spannen luit. Dat Jan de Bont zien aigen administroatsie eerst mor es op odder moaken mos. En dou e kloar was mien zien schelderij, zee e, dat ik wel opsakkedaaiern kon.

Cees: t Is toch nait woar.

Inspecteur: En waist wat t mooiste, t maalste van t haile geval was.

Cees: Ik heb gain idee.

Inspecteur: Hai smeeet de leste aanmoanen veur Jan de Bont veur mie op toavel en zee, ik herhaal t woordelk: 'Ie zörgen der mor veur, meneer de inspecteur, dat dizze finoale aanmoanen bie Jan de Bont in d'buzze komt en as e nait binnen n poar doage betoalt, den zugt ter slecht veur hom oet.'

Cees: Zo'n bedraigen, dat kin toch nait.

Inspecteur: Nee, mor wat hailemoal nait kin, is wat e mie as bodschop mitgeven het. Moust goud luustern: 'En as e nait betoalt, den loat ik Cees Maggelt n stokje in d'kraante zetten, dat plietsie Panjer Pinkster zok loat gebroeken deur wanbetoalers en dat e n gerespecteerd baauwbedrief as van mie vaals beschuldegd het.'

Cees: Dit is ja pure intimidatsie.

Inspecteur: Den binnen wie t doar tenminnt over ains.

Cees: En het Jan intussentied betoald?

Inspecteur: Dat denk ik nait.

Cees: Direkteur van t baauwbedrief is ook nog nait bie mie west. Dus mag ik aannemen, dat Jan betoald het. Ie hebben d'leste aanmoanen toch wel bie Jan òfleverd.

Inspecteur: Cees, sommege zoaken mouten je nait in d'openboarheid brengen.

Cees: Ik snap der nou gain fozzel meer van inspecteur. Wat wollen je mie aiglieks vertellen.

Inspecteur: Dat sommege zoaken t daglicht nait verdroagen kinnen en as handhoaver van de wet en regelgeven heb ik te zörgen, dat d'openboare orde nait in gevoar komt.

Cees: Ie spreken nog aaltied wartoal. Ik begriep der niks van.

Inspecteur: Dou magst alles in d'kraante zetten, wast wilt, Cees Maggelt, mor wat ik die nou vertel, kin t daglicht nait verdroagen.

Cees: Wat hebben ie wel doan, inspecteur.

Inspecteur: Dat zol'k die vertellen, mien jong. Ik was vast van plan om op weg van t baauwbedrief noar t bero even bie Jan de Bont langs te goan om t braifke òf te levern.

Cees: En wat zee Jan wel?

Inspecteur: d'Aanmoanen stelde niks veur, t was mor n cìntekroam.

Cees: Ie binnen nait noar Jan tou goan?

Inspecteur: Nee, Cees. t Was de muite nait.

Cees: Ie hebben t zulf betoald.

Inspecteur: Klopt. Net as ik al zee, t algemaine belang staait aaltied veurop. En in dit geval is dat ook zo.

Cees: Of ist joen belang?

Inspecteur: Och, wat mout ik doarop zeggen.

Cees: Mor den haar Jan dus ook nait bie mie kommen huifd.

Inspecteur: Nee, dat bezuikje bie Jan is der nog nait van kommen.

20160304